

## ՀԱՄԼԻԿԻ ԱՂՈԹՔԸ

### Ըստ ԿԼԱՎԴԻԱ ԼՈՒԿԱՇԵՎԻՉԻ

Իրիկունն է: Համլիկը պատրաստվում է քնելու: Մայրիկը շորերը հանեց ու ասավ.

— Դե՛, հիմի աղոթիր:

Երեխան շոքեց իր ճերմակ անկողնում, «Հայր մերն» ասավ ու մեծ, պայծառ աչքերը վեր ուղղելով Աստծուն խնդրեց.

— Աստված ջան, պահի հայրիկին, մայրիկին, Մուշեղին, Աշխենին, Նունիկին, Անոյին, Արփիկին...

Ու կանգնեց:

— Էլ ո՞ւմ,— հարցրեց մայրիկը:

— Պապին, տատին, հորեղբայր Վահանին, Սիգուշին, Լևոնին, Կուտիկին:

Սիգուշն ու Լևոնը իր ընկերներն էին, իսկ Կուտիկը իրենց շունն էր:

Աղոթքը վերջացնելով, նա ուրախ-ուրախ մտավ վերմակի տակ:

Մայրիկը ծիծաղելով նրան համբուրեց ու ասավ.

— Ախ, դու անպիտան, Կուտիկին էլ մեզ հետ խառնեցի՞ր:

— Ի՞նչ կա որ... Չի կարելի՞: Բաս Կուտիկին չպահես, Աստված, նրան թո՛ղ...

Մայրիկը ծիծաղելով մին էլ համբուրեց ու դուրս գնաց:

Երեխան սկսեց մտածել՝ «Ինչո՞ւ Աստված չպահի Կուտիկին, ինչո՞ւ նրան թողնի»...

Մտածեց, մտածեց, գլուխը հանեց անկողնի միջից ու շնչաց.

— Չէ՛, Աստված ջան, չէ՛, Կուտիկին էլ պահի, բայց մայրիկին չասես: